

**Ngu jo cja xi chja**  
**xujun changá tsēhē Nina VIII**

**Historias del Antiguo Testamento VIII**

**1 Samuel 16:14 - 2 Samuel 10**



en el mazateco de Chiquihuitlán de Juárez



**Ngũ jo cjuá xi chja  
xujun changá tséhě Nina VIII**

**Historias del Antiguo Testamento VIII**

**1 Samuel 16:14 - 2 Samuel 10**



**Las ilustraciones son propiedad de la Fundación David C. Cook, usadas con permiso.**

**Primera edición  
Historias del Antiguo Testamento VIII  
en el mazateco de Chiquihuitlán de Juárez  
México, D. F. .6C  
Enero de 1994**

## **Historias del Antiguo Testamento VIII**

### **Tsijane David arpa rē me cojo sa xi cumasua rē xahasen rē Saúl me xi matitjun jan**

**(1 Samuel 16:14-23)**

Tsēhē xi hindē cavisecuaain Nina Saúl sacuaaha xi cavisecoo me titjun ne, jiya hora ne, jemu suaxti rē Saúl ngu hasen tsehen. Hane xi xuta xi sahmi xa rē me meje tsinguejñu rē me hora hya ne, cachja me cojo rē me xi meje rē xi cuanguise me yo xi tsijane arpa tsēhē me hora xi suaxti rē me hasen tsehen jan. Xi ma rē xuta jan ne, hya xi fane arpa ne, cuma cuisecoo rē Saúl xi cumasua rē xahasen rē me. Ngajan xi ngu cha xi sahmi xa rē Saúl ne, cachja cha xi ngu cha quihndi rē Isaí ne, ndaja ma tsijane cha. Cuatjin camá xi Saúl ne, cajindaya me David, hane cafehe cha cavejña cha ndava Saúl. Hane jima ngu ndiya xi suaxti rē Saúl hasen tsehen jan ne, catsijane cha David arpa rē cha. Hya xi camá ne, jercu cavetjuxihin cha Saúl. Cuatjin camá xi nixtin xi quiji sa ne, cavetaha Saúl David xi cuaha cha quicha nduju rē me xi sahmi cuidadu cha. Hacuaha tsujyihya cha cojo hya xi cjuecojo Saúl xcun si. Jiya nixtin ne, cavejña David

ndava Saúl hane jiya nixtin ne, cavuya casahmi me cuidadu rē chu tsánga rē nahmi rē me.



**Catsiquehen David ngu cha sindadu filisteo  
xi jemu hnga xi hmi rē Goliat**

**(1 Samuel 17:1-18:5)**

Ngu ndiya xi jima nga si xi sahmi sindadu rē xuta tjë rē Israel cojo sindadu rē xuta filisteo, carná xi hinchaya xicjin cha rcu naxi, ngu ngu ladu cha, ngu cahndë hinchaya cha. Ngajan xi ngu cha

sindadu rë xuta filisteo jan ne, cavetjuxin cha tsëhë ngajfi rë xicjin cha, sehe cajindayataha cha sindadu rë xuta tjë rë Israel. Cha filisteo jan ne, jemu jyë cha ta sacuaaha jyan metru hnga cha. Hacuaha jemu



ndaja cavëhëchjine cha yojo rë cha xi sahmi cha si. Goliat, hmi rë cha jan. Hya xi camá ne, cajindaya cha cachja cha cojo xuta tjë rë Israel xi cahndë xi cuma si ngajñi rë yëjë sindadu jan ne, cuaxijin me ngu sindadu rë me xi cjue scaan cojo cha Goliat. Hane xi cuatjin scaan me cojo xicjin me, cuma tsejen jarë ladu xi cuitexa ladu condra rë. Sá xi cha Goliat jan sahmi cha ganar ne, xuta filisteo cuitexa me yëjë xuta tsëhë nangui Israel. Peru sá xi sindadu rë xuta tjë rë Israel jan sahmi cha ganar ne, ngajan xi xuta tjë rë Israel cuitexa me yëjë xuta filisteo. Peru yëjë sindadu rë xuta tjë rë Israel

jan ne, jemu tsacjun camaha ni me, hane ndastu yo me xi tsingacun xi sua me cjua rē me xi cjue scaan me cojo cha ta jemu jyē cha.

Nixtin hya ne, catsijyan cha hntsē David xi cha tjun jan ne, cojo cha hinchajñi cha ngajñi rē sindadu rē Saúl, me xi matitjun jan. Jinguyējē rē ne, hya tisahmi cuidadu David chu tsánga rē nahmi rē cha. Ngu nixtin jan ne, cachja Isaí cojo David xi cjue scutsejen cha hacutjin siutaha hntsē cha, hacuaha cjuecojo cha hitsē comida xi sinē xicjin cha. Hane quiji David sacuaha cavitexa nahmi rē cha. Hya xi cafehe David hiscan siu chjine sindadu jan ne, ha cavatju ngu sá xi nchunchujun ni jindayatata Goliat xuta tjē rē Israel. Hane xi cahndē David cjua rē cha jan ne, cachja cha xi jemu choho nuhya rē xi cuatjin squindayatata cha sindadu rē xuta ladu rē Nina. Ngajan cachja David xi suva cha cjue cha scaan cha cojo Goliat. Hane xi camachaya rē Saúl cjua rē David ne, catsingatju me xuta rē me xi quiji chjaha rē cha sehe cachja Saúl cojo rē cha cuatjin:

—Ngaye ne, cumajin cuihin nihñi cojo cha si. Cha vėhē ne, ngu sindadu xi ha jemu tjin rē cha cjuatacun; hane ngaye ne, sehe ngu cha chihndē ngaye. —Cuatjin cachja me.



Pero David ne, cuatjin cafayangui cha:

—Quixi nújun peru hacuaha tjin ná cjuatacun. Ngajñi rē xa xi casatē ná xi sahme cuidadu cha tsánga rē nahmi naha ne, catsiquehen chu xa hacuaha catsiquehen chu oso xi meje tsiquehen rē chu tsánga jan. Hya xi cuatjin cavátju camá cojo chu naha ne, Nina ne, casahmi ná me cuidadu. Vēhē xi quihndē ne, tjin ná cjuaquixi ta hacuaha Nina sahmi ná me cuidadu xi cjuē sahme si cojo cha filisteo vē. —Cuatjin cafayangui David.

Hane xi cuatjin cafayangui David, tsajin sa mé cjua xi cachja Saúl. Suva me cachja me xi meje rē xi cjuaha David yējē quicha rē me hacuaha cuaja cha tsjian quicha rē me xi tsēhē si. Sehe cavaja David quicha jan sacuaha cachja Saúl, peru tsēhē xi mangaain rē cha vaha cha xcusun jan ne, cavuya cafahaxin nga cha. Sehe quiji cha xanga ndajyē, hane ngajan cafaha cha sacuaha hñu ni ndyojo langa xi jemu ndaja xta. Cavincha cha ndyojo jan cahntsua morra rē cha sehe quiji cha hisca secun Goliat xi scaan cha cojo xicjin cha. Peru tsajin quicha yaha cha, hane suva ni nahñu rē ndyojo tu vetju rē cha cavaha cha.

Hya xi camá ne, xi cavëë Goliat xi nduva David ne, tu cavejnuçëë cha tsëhë cha ta chihndë cha hacuaha tsajin quicha yaha cha. Peru David ne, cuitjin cachja cha cojo cha:



—Caveni vejnuçuun ta, Nina xi cjuaquixi jain, Nina xi chjihinrcuin ngayin xuta tjë rë Israel ne, me vëhë cuisecoo me ngahan hane sahme ganar. —Cuatjin cachja cha.

Hane Goliat ne, cavetsihin canduva cha taha hiscan cjui David. Hane cha David ne, hacuaha quiiji tiña sa cha. Sehe cavaxë David ngu ndyojo lihndi cahntsua morra rë cha hane caveya cha cahntsua

nincha rē nahñu tuvetju rē cha. Hane xi tu catsitijñu cha nahñu jan ne, catsicjin cha ndyojo jan. Hya xi camá ne, quiji casatē suva xten Goliat, hane caticja cha Goliat. Hya xi camá ne, ngutjen cavanga David quijjaha cha quicha rē Goliat, sehe cavatēsun cha rcu cha cojo quicha rē suva ni cha. Hane sindadu rē xuta filisteo jan ne, catsacjun cha camá ne, cavetsihin cavanga cha. Peru sindadu rē xuta tjē rē Israel jan ne, quiji cavangacojo me yējē sindadu jan hisca ngajan nangui rē cha. Hane jemu cjin xuta filisteo camá catsiquehen sindadu rē xuta tjē rē Israel cha.

Hane xi camachaya rē Saúl, me xi matitjun jan, xcusun xi camá ne, cafehya me favor cojo Abner, me xi vitexa me sindadu israelita, xi cjuejaha me cha David cjuecojo me xcun Saúl. Hane Abner ne, cuatjin casahmi me. Hane xi cafehe cha David xcun me xi matitjun jan ne, yahatsja cha rcu Goliat. Ngajan xi Saúl ne, cafehya me favor cojo cha David xi cuejñacahndē cha cojo rē me, hane cuatjin camá. Hindē cavuyaain David ndava nahmi rē me. Ngajan camá xi cha Jonatán quihndi rē Saúl ne, jemu amigu ndaja rē cha casahmi cha David, hisca casua rē David ngu quicha espada. (Quicha espada ne, hacuiin tu yo ni tjin, ta tsajin xuta israelita xi ma sahmi me hane

jemu ndya sacu.) Hya cavetsihin catsingatju Saúl cha David xcun si. Hane David ne, tsëhë xi jemu ndaja sahmi cha xa rë sindadu ne, vëhë xi cafhaxa cha xi vitexa cha sindadu xi yahnga. Cha David ne, cavaxëtje cha yojo rë cha tsëhë yëjë si xi sahmi cha cojo sindadu xi vitexa cha. Vëhë xi jemu cachuya rë xuta israelita. Hisca cojo yahnga sa me xi matitjun tsëhë sindadu rë Saúl ne, hacuaha ndaja cavëë me cha David.



**Meje tsiquehen Saúl David ngatsë rë xi hitsë sa ndaja  
chja xuta tsëhë David xi cuma rë xi chja me tsëhë Saúl**

**(1 Samuel 18:6-20:42)**

Hya xi camá ne, ngu ndiya hya xi jercu cjín camaha ni cha sindadu rë xuta filisteo catsiquehen David ne, cavetju na yachjin rë xuta tjë rë Israel quiji tjengui na sindadu ladu ra hya xi cuya me. Hane tisë na, hacuaha titë na. Casë na ngu tsëhë Saúl, me xi matitjun, peru hacuaha casë na tsëhë David xi sahmijyë na me. Tichja na xi tisë na jan xi Saúl ne, catsiquehen me chuva mil sindadu condra rë me; peru sacuaha David ne, catsiquehen me të cuatjin sa. Hya xi camá ne, cahndë Saúl sacuatjin tisë na yachjin jan, hane jemu camacjan rë me. Xi má rë me ne, sá xi cuatjin tsingatahatacun xuta ne, jemu tjun cuetahacacun xuta David xi cuma rë suva me, hane sehe cjuaha David cahndë rë me. Cojo cjuacjintacun vëhë ne, cavetsun cjuandaja xi tjin rë me cojo David.

Hane xi camá nchujun nguini, cavuya xi choho casahmi nga hasen tsehen cojo Saúl. Sehe cajindaya me David sacuaha xcusun rë me xi catsijane me arpa rë me. Peru jo ndiya hya ne, jinguyëjë rë xi

tsijane David ne, Saúl ne, yaha me ngu quicha lanza hane quiji me cavitengui me David. Peru David ne, tsëhë xi hacuiin mangucacun camaha me ne, cama xati catsiquindiya me yojo rë me catsijo ndiya xi tivitengui Saúl me, hane casacuihmaain rë me. Ngajan cavacún



rë Saúl tsëhë xi Nina ne, tivisecoo me David cahndë rë suva me, hane quihndë tivisecuain rë me. Vëhë xi jemu catsacjun me David. Hane ngatsë rë xi tsacjun me David ne, casuaxa me David xi cumá me ngu capitán rë sindadu rë me, peru tu tacunya ni me xi tsiqehen condra rë me David ngajñi rë si. Peru David ne, cavetjutje me

ngajñi rē yějē si xi quiji me jan, tsēhē xi Nina tivisecoo rē me. Hya xi camá ne, cojo vėhē camá xi hitsē sa tsacjun Saúl me; peru yahnga xuta tjē rē Israel ne, jemu faharcun me David.

Hya xi camá ne, casacuse rē Saúl ngu cjuatacun cojo sa xi cueya David má rē me. Na quihndi ngascan rē Saúl ne, na xi hmi rē Mical ne, camá meje rē na David. Sehe cachja Saúl cojo David xi cuma cuixan David cojo rē na. Xcusun rē xuta jan ne, fehya me ngu chji rē quihndi chjuun. Hane xi meje rē Saúl sacuaaha chji rē quihndi rē me ne, meje rē me xi tsiquehen David ngu cientu xuta filisteo, xuta condra xi hitsē sa cjan rē. Hacuaha cachjahma Saúl cojo xuta rē me xi cuijnecacun David xi “joho” cuichja me. David ne, hacuiin ngu cacun me xi meje rē me ta vėē me xcusun rē Saúl, pero cajnecacun me. Xi má rē Saúl ne, xuta filisteo jan tsiquehen me David, hane ngajan cjuē cjuañihi cojo David. Hatuxa cavacún rē Saúl xi David ne, camá condra rē me. Hya xi camá ne, David jan ne, catsingatihin me contrato jan, hane quiji catsiquehen me jo cientu xuta filisteo. Sehe na Mical ne, cavixan na cojo David. Cuatjin camá xi Saúl ne, hitsē sa catsacjun me camá tsēhē David tsēhē xi tsejen xi hisca na

quihndi rē me ne, hatuxa hmucacun jain na David, hacuaha tsejen xi Nina ne, jemu tivisecoo rē David.

Ngajan xi Saúl ne, hitsē sa cavejñacacun me xi meje rē me xi cueya David. Cachja me cojo xuta rē me hacuaha cachja me cojo yějē xuta xi sahmi xa rē me xi sá xi sacu rē me cahndē ne, tsiquehen me David. Peru cha Jonatán, quihndi rē Saúl ne, tsēhē xi jemu amigu ndaja rē cha David má cha, cachja cha cojo David cjuatacun rē nahmi rē cha. Sehe catsinguijnehnchan cha cjuatacun rē nahmi rē cha ndastu hitsē. Hane hiscan xi cajnetaha ne, catsindeya me xi matitjun jan cjuatacun rē me, cachja me xi tsiquiin me David. Cuatjin camá xi David ne, quijinduju me cavisecoo me sindadu rē Saúl. Quiji sa me ngu ndiya casahmi me si cojo xuta filisteo hane casahmi nga me ganar.

Pero hya xi camá ne, hasen rē xitsehen jan ne, casuaxti nga rē Saúl. Hane hya xi titsijane nga David arpa rē me tsēhē Saúl cojo sa xi tsinguejyu me ne, cavuya cavitengui nga Saúl lanza rē me David. Xi cavetjutje David hya ne, quiji me ndava me. Pero ngajan cachja na Mical chjuun rē me xi tjin rē xi cuanga me tsēhē ndava me



nguixun hya ta sá tu tsiquehen nahmi rē na me. Quixi ta, ha catsingatju Saúl xuta xi cjue setaha cuidadu ndava David cojo sá xi hacuiin cuanga me. Pero na Mical jan ne, cavaxē na David taha ventana. Hya xi cavanga David ne, sehe casahmi na sacuaaha ngu xuta cafaña na xcun nachan, hane cavetsa rē na tsjanga, cojo sa xi tsejen sacuaaha xi David jiñacuaha me ngajan. Hya xi camá ne, cha xi caviyujutaha cuidadu ngajan ne, cavisehen cha cahntsua ndihya xi tsihñu cha David cjuecojo cha. Hane na Mical jan ne, cavindacha na cha. Cachja na ta David ne, jiñahmu me. Sehe quiiji cha. Xi quiiji sa hora ne, camachaya rē Saúl xi na Mical ne, cavindacha na me. Jemu camacjan camaha ni rē me cojo rē na. Pero na vëhë ne, cjuandesu cachja na cojo nahmi rē na. Cuitjin cachja na:

—Jeya! Casahme ta sahmi ngujoyē xi sahme. Sá xi cavisecoon rē cha David xi cuetjutje cha ne, catsiquehen cha ngahan. —Cuatjin cachja na.

Jinguyējē rē xi camá cachja Mical ne, cavetjutje David. Quiiji casuacuenda me Samuel xcusun xi camá jan. Hane Saúl ne, cavanguise me David, peru camajin casacu rē me. Ngajan xi David

ne, quiji cavanguisehma me amigu rē me cha Jonatán, sehe cavinenguisse me cha cuitjin:

— ¿Mé má cuatjin cjan rē nahmi riji cojo ná? —Cuatjin cavinenguisse me.

Hane cha Jonatán ne, xi má rē cha ne, cavindeya cjuatacun rē nahmi rē cha, hane cachja cha ta quixiin xi cjan rē nahmi rē cha. Pero David ne, cuitjin cachja me:

—Tjin ná cjuaquixi xi cjan rē me cojo ná. Chjaain me cojo ri ta tsēhē xi vëē me xi jemu amigu naha ngaye. —Cuatjin cachja David.


Hya xi camá ne, cafehya me favor cojo cha Jonatán xi cjue tjengui cha cjuaquixi rē cjuacjintacun vë, sehe cuya cha cojo cjua tsēhē David. Hane cha Jonatán ne, casua cha cjua rē cha xi cuatjin cjue cuinenguisse cha hacutjin siu cjuacjintacun vëhë. Hacuaha cuya cuichja cha cojo David mé cjua xi sacu rē cha. Hya xi camá ne, casacu rē cha Jonatán cjuaquixi xi hatuxa tjincacun nahmi rē cha xi tsiquehen me David. Hane tahahma quijicani cha cjua cojo David hacutjin cjua xi casacu rē cha. Tahahma quiji cha hacuaha casahmi

cha cuidadu cojo sá xi tsajin yo vëë rë hiscan tacun David. Handasa cuatjin siu cjuacjintacun cojo nahmi rë cha, peru David cojo cha Jonatán jan ne, casua me xingu xingu me cjuarë me xicjin me xi tsicjiin me xi amigu rë me xicjin me. Hacuaha casua me cjuarë xi cjuahacuenda me xuta rë xicjin me xingu xingu me. Sehe quiji Jonatán, hane David ne, cavetjuxin me tsëhë ngajan. Cavacún rë me xi meje rë xi cuetjuxin me cjuehma me cojo sa xi tsajin yo tsiquehen rë me.

### **Cavanga David tsëhë Saúl, me xi matitjun**

(1 Samuel 21-23)

Hya xi tacun hma David tsëhë Saúl ne, quiji cavisiajmi me cojo nahmi xi matitjun xi hmi rë Ahimelec. Hacuaha ngajan cafehya me niñu xi sinë me. Hane Ahimelec ne, quijircun rë me tsëhë David xi cuatjin suva me tsujyihya me. Sehe cavinenguisse me, ¿mé camá? Hane David ne, cachja me ngu cjuandesu. Cachja me xi tsujyihya me ngu cjuacjintacun xi jemu hma siu tsëhë Saúl me xi matitjun. Ngajan xi Ahimelec ne, cachja me xi tsajin niñu, ta suva tutu niñu xi camanchacun xi siu xcun ngasuncun ne, vëhë ni xi tjin. Handasa xi



niñu vĕhĕ ne, suva ni nahmi, o sá xuta tjĕ rĕ Leví xi tjin rĕ me chuya rĕ xi sinĕ me niñu vĕhĕ, peru casua Ahimelec niñu jan quijicojo David xi sinĕ me cojo cha xi siuya rĕ me. Ngaxtun vĕhĕ ne sehe, cavinenguise David Ahimelec, ¿há tsajin rĕ me ngu quicha espada o sa ngu lanza ngajan? Hane Ahimelec ne, casua rĕ me David espada xi camá tsĕhĕ nima Goliat jan. Hane xi cafaha David espada cojo niñu jan ne, sehe cavetjuxin me tsĕhĕ nangui Israel.

Xi tjun tjun cavetjuxin David nangui Israel ne, quiji me nandya Gat, ngu ciuda rē xuta filisteo. Peru xuta nandya jan ne, sehe casacuse rē me yo xuta má David. Hane tsēhē xi catsacjun David sá tu tsiquehen xuta xi matitjun tsēhē nandya Gat jan me ne, casahmi David sacuaha xi cama sca rē me. Hane ngatsē rē má rē xuta jan xi sca rē David ne, cama cavetjuxin David tsēhē nandya Gat. Sehe quiji me ngu nguijo xi hmí rē Adulam. Xi tacuncuaha me nguijo jan ne, camachaya rē xutacha rē me cojo yahnga me xicjin me xi ngajan tacun me, hane quijitjengui rē me, ngajan caviyuju me cojo xicjin me. Hacuaha jemu cjin xuta xi tjin rē me tu mé ni cjuacjintacun cojo Saúl, o sá xi quitjen me tsēhē me ne, cojo me quiji me casahmitangun me cojo David. Cuatjin cama cjin me, hisca camá sacuaha ñuju cientu xihin xi camatangun ngajan. Sehe quijicani David xutacha rē me cojo me xi matitjun tsēhē nandya Moab, ta ngajan ne, ha cuidadu tjin me. Hya xi camá ne, profeta Gad ne, quijitjengui me David ngajan nguijo jan. Sehe cachja me cojo David xi meje rē xi cuetjuxin me tsēhē nguijo jan, sehe cjue me cuiyujhma me ngajñi nguijñacha xi siu ngajan nangui rē xuta tjē rē Judá.

Yějě nixtin xi caviyujutaha David nguijñacha jan ne,  
 cavejñacacun Saúl xi cjuaha me David, peru tu caqueya rě me.  
 Camacjan rě me cojo xuta xi sahmi xa rě me tsěhě xi hisca xi ngu  
 cha jan cachjaain cha cojo rě me xi quihndi rě me xi hmi rě Jonatán  
 ne, jemu vinga rě David, hacuaha David ne, jemu vinga rě Jonatán.  
 Ngajñi rě cjuacjan rě me ne, ngu cha xin tsěhě nandya Edom xi cojo  
 cha tacun cha cahntsua ndava Nina hora xi cafehya David niñu cojo  
 espada jan ne, cha vėhě casuacuenda cha Saúl hacutjin camá hya.  
 Ngajan xi Saúl ne, catsingatju me quiji chjaha rě nahmi Ahimelec ta,  
 cacjan me cojo me tsěhě xi cuatjin cavisecoo me David. Cachja  
 Ahimelec xi casahmi me mé xi casahmi me ngatsě rě xi vėě me xi  
 David ne, jemu xuta rě Saúl má me hane cuatjin casahmi ngu jyě xi  
 visecoo me cha. Peru handasa xi cuatjin cachja Ahimelec ne, Saúl  
 ne, cavitexa me xi cueya Ahimelec cojo yějě ni nahmi xi tsěhě  
 cahndě vėhě. Cueya xuta rě me cojo langa rě me cojo chu rě me.  
 Ngu tutu sa Abiatar, me xi quihndi rě Ahimelec, cavangui me tsěhě  
 yějě xuta jan. Hane me vėhě ne, quiji cavanguise me David.  
 Ngajan xi David ne, cachja me cojo rě me ta, sacuatjin tivanguise  
 Saúl me catsijo ni me ne, jemu sa ndaja ne, catisahmitangun ni

**Abiatar cojo rë me. Cuatjin cachja me cojo Abiatar, hane cuatjin camá.**

**Hya xi camá ne, nixtin hya ne, quiji xuta filisteo casahmi me si cojo ngu ciuda xuta tjë rë Israel, ngu ciuda xi hmi rë Keila. Hane David ne, quiji cavisecoo me xuta ciuda jan, hane cavaxë me yojo rë me tsëhë si jan ta tsëhë xi Nina cavisecoo rë me. Sehe camachaya rë Saúl xi nandya Keila quitaha David, hane casahmi chihin me cjua xi cjue cjuaha me David ngajan. Ngajan xi David ne, cavinenguise rë me Nina mé xi ndatjin sahmi me. Hane Nina ne, casua me camachaya rë David xi Saúl ne, tivëhëchjine me sindadu rë me xi cjue me sahmi me si ngajan Keila. Vëhë xi ndajintjin xi ngu ni cahndë cuiyuju David ta sa choho cuatju xuta nandya vëhë. Vëhë xi meje rë xi tu ngehe tu ngajan tsujyihya David cojo xuta rë me. Sehe xi camachaya rë Saúl xi cavetjuxin David tsëhë Keila, hane casmicacun me cjuatacun jan. Hya ne, camatangun sacuaaha jyun cientu xuta xi tsujyihya me cojo David.**

Saúl ne, catsujyihya cavanguise sa me David, peru Nina ne, casuaain me cahndë xi sacu rë me David. Hane ngu nixtin jan ne, tahahma quiji cavisiajmi Jonatán cojo David, cuitjin cachja me:

—Xi carcuin ngaye, David ta, tsajin mé cumá sahmi nahmi naha cojo ri. Cuechu nixtin xi ngaye cumá ngaye xuta matitjun tsëhë yëjë xuta tjë rë Israel, hane ngahan cuisecoo ri nihña xa. Hisca nahmi naha ne, ndaja machaya rë me cjuatacun vëhë. —Cuatjin cachja Jonatán.

Ngajan xi David cojo Jonatán jan ne, cavuya casua nga me cjua rë me xicjin me xi hatuxa tsicjiin me xi amigu rë me xicjin me, sehe cavuya café Jonatán ndava me. Hane David ne, rcu naxi quiji cavangahma me. Peru xi camachaya rë xuta xi siu tiña jan xi ngajan tacunhma David ne, casua me cjua rë me cojo Saúl me xi matitjun jan xi cuisecoo me me cjue cuanguise me David. Hane xi tu camachaya rë David cojo xuta ladu rë me ne, cavetjuxin me tsëhë ngajan. Peru Saúl, me xi matitjun, cojo sindadu rë me ne, quiji tjengui me David, hane hisca ha tu hitsë sa cuechutaha me me. Hya xi camá ne, caféhe ngu cha xi yaha cjua tsëhë Saúl xi xuta filisteo



ne, tisahmi me si cojo xuta tjë rë Israel. Hane ngatsë rë cjuacjintacun vëhë ne, catsujyihyaain tjenguin sa me David ta, quiji casahmi me si cojo xuta filisteo jan.

**Jo ndiya casua David cahndë xi cavatjuhnga Saúl,  
ta catsiquiin David me**

(1 Samuel 24-27)

Hya xi cavatju casahmi Saúl si cojo xuta filisteo ne, cavuya quiji cavanguise nga me David xi tsiquehen me me. Sehe camachaya rë me hiscan hinchahma David, hane quiji cojo me jyan mil sindadu rë me, quijitjengui me David. Hya ne, David cojo xuta ladu rë me ne, hinchahma me ngu ngojo naxi xi jemu nungun xi tacun ladu vëhë. Hane ngu ndiya ne, cavisehen Saúl ngojo naxi jan xi cjui me caniña. Hane xuta ladu rë David jan ne, cachja me cojo David xi tsiquehen ni me Saúl ndama ta jemu ndatjin cahndë cafehe me. Peru David ne, miji tsiquehen me me ta tsëhë xi Saúl ne, matitjun cuaha me tsëhë xuta nangui Israel hacuaha xcun Nina ne, matitjun me tsëhë David. Cahndë rë vëhë ne, tu quijivaha ni me hisca tacun Saúl. Jyujyuu ni quiji me, sehe cavatë me hitsë yuju rë tsjian xcun rë Saúl.



Hane hya xi cavetju Saúl tséhë ngojo jan, hora xi ha camá cjín me hitsë ne, sehe cavetju David. Sehe cajindaya me tséhë Saúl. Titjun catsiquindi me xcun me hisca nangui hora xi vutsejen me Saúl ta faharcu me me xi matitjun jan, sehe caviseacun me catsingacun me yuju rë tsjian xcun rë Saúl jan. Ngajan xi David ne, casuacuenda me xi casacu ndaja rë me cahndë xi cuma tsiquehen me Saúl, peru catsingatjuhnga me. Sehe cachja David cojo rë me xi Nina ne, me

vëhë cuichja me yo xi cun rë. Hane xi cahndë Saúl cjua xi cachja David jan ne, camá sava rë me, hane cuitjin cafayangui me:

—Ngaye ne, ndatjin xi nóje. Ngahan cun ná xi cuatjin choho sahme cojo ri. ¿Jani cuanguen xi sacu ngu xihin xi tsingatjuhnga cha ngu condra rë cha? Suva ngu xuta ndaja xi cuatjin sahmi me. Hindë ne, Nina tsicuya me cjuandaja riji tsëhë xcusun xi canihñi vi. Hacuaha ngahan ne, ha hvë han ta ngaye cumatitjun ngaye. Hacuaha yëjë xuta tsëhë nangui Israel ne, jemu hñu cuma me cojo cjuatacun rë me, hacuaha jemu cjue xcun me jinguyëjë rë xi ngaye cuitexe. Peru ndastu ngu favor cuehya cojo ri, ta tehe cjua riji cojo ná xi hya xi cuitexe ne, niquiin yëjë xuta naha. —Cuatjin cachja me ta tsëhë xi cuatjin má xcusun rë xutaxin hya xi cumatitjun me.

Hya xi camá ne, David jan ne, casua me cjua rë me sacuatjin xi meje rë me xi matitjun jan, sehe cafe Saúl ndava me. Hane David ne, cavejña ni me hiscan xi ha hinchahma me ngajan ngojo naxi jan.

Hane jemu chuva nixtin jan ne, cahme profeta Samuel. Yëjë ni xuta tjë rë Israel jan ne, caviyuju me xun rë tsëhë xi jemu choho camá rë me.

Ngajñi rē nixtin vĕhĕ ne, catsingatju David ngujo xuta ladu rē me quiji cavisiajmi me cojo ngu cha xi hmi rē Nabal, cojo sa xi sua me hitsĕ cjuatjo xi sua me. Nabal jan ne, jemu nchina camaha ni



me. Hya xi catsingatju me xuta jan ne, David ne, cachja me cojo xuta xi tsinguitsjen rē me Nabal xi hacuiin tu cuenda cuehya rē me ta cavisecoo rē me. Hya xi hinchataha xuta xi sahmi cuidadu chu

tsánga rē Nabal tiña hiscan tacun David cojo xuta ladu rē me jan ne,  
 me xi cuacun jan ne, cavisecoo rē me xi tsajin camaha ni mé choho  
 cavatju xuta xi sahmi cuidadu chu jan hacuaha tsajin mé choho  
 cavatju chu jan. Nixtin xi quiji cachja xuta ladu rē David cojo Nabal  
 ne, hya tivejnu Nabal chu tsánga rē me. Peru Nabal ne, casahmii me  
 sacuaha xcusun rē xuta vē ta tu choho cafayangui me tsēhē xuta ladu  
 rē David, hane ndastu mé casua rē me. Ngajan xi David ne,  
 camacjan rē me tsēhē xi cuatjin tsajin mé cjuandaja tsicuya Nabal  
 tsēhē cjuandaja xi casahmi xuta ladu rē David jan cojo cha xi sahmi  
 cuidadu chu tsánga jan. Hya xi camá ne, cavitexa David xuta ladu  
 rē me xi cuēhēchjine me yojo rē me sehe cjue sahmi me si cojo  
 Nabal cojo yējē xuta ladu rē me. Peru Nabal jan ne, tjin rē me ngu  
 na chjuun rē me xi hmi rē na Abigail. Na vēhē ne, jemu ndajyih na  
 hacuaha jemu quicuncacun na. Hane xuta xi sahmi xa ndava na  
 casua camachaya rē na tsēhē cjua xi catsicuya Nabal tsēhē David.  
 Hane xi ndaja vēē na xi ndajintjin cuetjun vēhē ne,  
 catsingatahacacun na xi hitsē sa ndatjin xi tsingatju na ngu cjuatjo  
 tsēhē David. Hya xi camá ne, jemu cjín xichine casahmi tangun na,  
 sehe catsicaniji na ngu chu burru, sehe quiji tjengui na David cojo  
 xichine jan. Hane xi cavechutaha na David ne, casahmi na

entregadu cjuatjo jan. Hacuaha cachja na cojo ta hitsë sa ndaja xi cjuahatsja me cjuatjo rë na xi cumá rë xi cueyangojo me tsëhë xi cuatjin choho cafayangui Nabal tsëhë me. Cachja na xi tsichaja me yojo rë me sá xi tsiquehen me Nabal cojo yëjë xuta xi siu ndava me. Hane xi cahndë David cjuatacun xi cachja na Abigail ne, cajnehnchan me ta tsejen xi tjin rë na chuva rë xi cuatjin cachja na. Hane catsingatihin me cafhatsja me cjuatjo xi yaha na jan.

Hya xi camá ne, hisca chaja sa cavatju tyjuhun nixtin jan ne, cahme Nabal. Hane xi cajnercu David xcusun vëhë ne, camachaya rë me xi Nina casahmi me castigu Nabal. Hya xi camá ne, David ne, quiji cachja me cojo na Abigail xi meje rë me na xi cuixan na cojo rë me. Hane sehe catsingatihin na cavixan na cojo rë me. Na Abigail cojo na Ahinoam ne, catsijo na xi cuacun vë ne, má na chjuun rë David hora xi cavanga me tsëhë me xi matitjun jan. Sacuaha na Mical, na xi chjuun tjun rë David ne, ha camá casua Saúl na cojo jingu sa xihin.

Hya xi cavatju sa nixtin ne, catsindeya nga Saúl cjuatacun rë me, hane cavuya catsingatahacacun nga me xi tsiquehen me David.

Casahmitangun me jyan mil sindadu sehe quiji cavanguise nga me David. Ngajan xi David ne, catsingatju me xuta xi quiji cavutsejensun jani hiscan xi viyuju sindadu rē Saúl. Sehe David cojo ngu xuta rē me ne, quiji cjin me hisca cahndē hiscan viyuju sindadu jan. Nina casahmi me xi yějē ni sindadu rē me xi matitjun jan ne, jercu siufē camaha ni cha hora xi cafehe David, hane hisca xi ngu cha cahviin cha yo xi cavisehen cahndē hiscan xi siufē me jan. Cha xi quijicojo David jan ne, ha ngutjen meje tsiquehen cha Saúl; peru casuaain David cahndē. Cachja David ta Nina ne, me vĕhē xi



sahmi me castigu Saúl. Cuatjin cachja David. Peru cafaha David tilu xi xinha nandá cojo lanza rë Saúl. Sehe quiji David rcu ngu naxi xi cjintaha hitsë. Hane tsëhë ngajan ni, cajindayataha me Abner, cha xi má jefe tsëhë yëjë sindadu rë Saúl. Catsixcuehyu me cha cuitjin: Cachja me xi meje rë xi hitsë ndaja sa cuidadu catisahmi cha me xi matitjun. Hacuaha cachja sa David cojo Abner xi sa xi ndaja cjuahacuenda cha ne, scuëë cha xi lanza cojo tilu nandá rë me xi matitjun ne, tsajin jan. Hora vëhë ne, casacuse rë Saúl xta rë David, hane cachja me cojo rë me. Sehe cachja David ta tsajin nixtin xi catsingatahacacun me xi choho sahmi me cojo Saúl. Hane ngatsë rë xi tsajin mé cjuachan tjin rë David, vëhë xi vijniircun David mé má cuatjin tsujyihya tjengui Saúl me xi tsiquehen me me. Ngajan xi Saúl ne, cachja me xi nijyutacun catitsijyëcacun David xi cuatjin cavejñacacun Saúl xi tsiquehen me me. Sehe cachja David xi catitsingatju Saúl ngu cha xi cjuejaha lanza rë me xi tacuntsja David. Hacuaha cachja sa me xi Nina cuaxëtje cjuahñu rë me xi cuatjin cavaxëtje me cjuahñu rë Saúl nixtin hya. Ngajan xi Saúl ne, cafe me ndava me. Hane David ne, cavuya quijixin me cojo xuta ladu rë me.



Hane tsëhë xi David ne, ha quihndë manguaaincacun me cojo Saúl ne, cavuya cafe nga me nangui rë xuta filisteo, ngu ciuda xi hmi rë Gat. Ngajan quijicojo me catsijo chjuun rë me hacuaha quijicojo me yëjë xuta ladu rë me. Hya xi camá ne, camachaya rë Saúl xi cuatjin quijixin David, hane ha quihndë catsujyihyaain tjenguiin me me. Hane David ne, quiji cafehya me me xi matitjun tsëhë nandya Gat jan ngu cahndë hiscan xi cuma cuejñacahndë me. Hane me vëhë ne, casua rë me ngu ciuda lihndi xi hmi rë Siclag. Ngajan cavejña David sacuaha ngu nu vatju. Nixtin xi cavejña David ngajan ne, cavetju me cojo xuta ladu rë me hane quiji casahmi me si cojo xuta condra rë xuta nangui Israel. Catsiquehen me xuta condra jan. Hacuaha cafaha me tsjian rë nima jan, hacuaha cafaha me yëjë chu rë nima. Peru cavindacha me me xi matitjun tsëhë nandya Gat jan, ta cachja David xi nandya rë xuta tjë rë Israel sahmi me si cojo. Vëhë xi xi má rë me xi matitjun jan ne, xuta tjë rë Israel ne, cavuya condra me tsëhë David. Pero hacuiin cuatjin cjuaquixi.

## **Cahme Saúl me xi matitjun jan cojo quihndi rē me**

### **xcun si**

**(1 Samuel 28-31; 1 Crónicas 10)**

Hya xi quitaha David ngajan Siclag ne, casahmitangun xuta filisteo sindadu rē me xi cjue sahmi me si cojo xuta tjē rē Israel. Hane me xi matitjun tsēhē nandya Gat jan ne, meje rē me xi David cojo yējē xuta ladu rē me ne, cjue sahmitangun me cojo sindadu rē xuta filisteo, sehe cjue sahmi me si cojo yējē xuta tsēhē nangui Israel. Hane David ne, casua me cjua rē me xi cjue sahmitangun me cojo me xi cuacun jan.

Jinguyējē rē xi tisahmitangun xuta filisteo sindadu rē me ne, Saúl ne, hacuaha cavetsihin casahmitangun me sindadu rē me. Hane xi cavēē Saúl xi jemu cjín camaha ni má xuta ladu rē xuta filisteo ne, catsacjun me camá. Hane sehe cafehya rē me Nina xi cuichja me cojo rē me mé xi cuetjucaa xi cuatju me cumá. Peru Nina ne, cafayanguiin me tsēhē Saúl. Cafayanguiin me handasa ngajñi nijña rē me o sá cojo ndyojo xi ma vaxē suerte sacuaha xcusun rē me. Hacuaha hisca profeta cachjaain me cojo me. Cuatjin camá xi Saúl

ne, cavanguise me ngu na surqui xi ma visiajmi cojo hasen rē nima ta hatuxa meje sacu rē me chuva rē mé xi ndatjin sahmi me. Nixtin hya ne, ha catsichuva suva Saúl yějě xuta xi ma sahmi me xa jan xi siu nangui Israel ta chuyiin rē Nina xcusun vė. Pero ngu xuta ladu rē me cachja cojo rē me xi tjin sa ngu chjuun xi ma visiajmi na cojo hasen rē nima. Tacun xu na ngu nandya lihndi xi hmi rē Endor. Ngajan xi Saúl ne, catsindeya me xcusun rē me cojo sa xi sacuiinsiin rē xuta yo me. Sehe quiji cavisiajmi me cojo chjuun jan. Hya xi cafehe me ngajan ne, chjuun jan ne, miji squindaya rē na hasen rē nima, ta tsacjun na. Tsacjun xu na sá tu cumachaya rē Saúl hane tsingatju me sindadu rē me tsiquehen rē na. Ngajan xi Saúl ne, casua me cjuar rē me cojo rē na xi tsajin yo tsiquehen rē na. Sehe cachja me cojo rē na xi squindaya na hasen rē nima Samuel, hane cuatjin casahmi na. Peru xi cavėė na xi hacui hasen rē Samuel xi tifehe ne, sehe ngajan cavacun rē na xi hacui suva Saúl xi quiji cavisiajmi cojo rē na. Ngajan xi hasen rē nima jan ne, cavinenguise rē Saúl cuitjin:

— ¿Mé má cuatjin titehendye ná? —Cuatjin cavinenguise.



Hane Saúl ne, cuitjin cachja me:

—Jemu tsavi camaha ni fi ngu cjuacjintacun xi tjin ná. Xuta filisteo ne, tсахmi me si cojo ná. Hane Nina ne, fayanguiin me tsahan. Věhě xi cajindáya nuju cojo sa xi cuinújun mé xi ndatjin sahme. —Cuatjin cachja Saúl.

Peru hasen rě nima Samuel ne, cuitjin cachja nga cojo rě me:

—Tsajin camaha ni mé cumachjirěhě ri xi vinenguise ná. Nina ne, ha quihndě hacuiin vinga ri me. Quihndě ne, condra riji má me tsěhě xi cavetihinrcuiin cjua xi cachja me cojo ri hya xi cavitexa me ngaye xi niquihin yějě ni xuta amalecita jan. Věhě xi cumá sacuatjin cachjá cojo ri vě. Me věhě ne, ha quihndě tsingatiin ri me xi ngaye matitjun ngaye. Nchujun ni xi cuihin nihñi si cojo xuta filisteo ne, me věhě sahmi ri me ganar tsěhě si xi nihñi jan, hisca cuma xi ngaye cojo quihndi riji ne, cueyun xcun si jan. —Cuatjin cachja hasen jan.

Hane xi cahndě Saúl cjua jan ne, jemu catsacjun me camá.

Hya xi camá ne, hya xi ha tjin tangun yějě sindadu rě xuta filisteo jan ne, mē xi matitjun xi yahnga jan ne, cachja me cojo me xi matitjun tsěhě nandya Gat, xi miji rě xi sua me vėhě cahndě xi David cojo yějě sa xuta ladu rě me cjuecojo me xi cuacun jan xcun si. Tsacjun me ta sa tu vasen si ne, cuya David condra rě me, hane David ne, cuisecoo me xuta tjě rě Israel. Ngajan xi me xi cuacun jan ne, casahmi me xi tsicuya me xi matitjun tsěhě nandya Gat jan David cojo xuta ladu rě me, hane cuya cjue me nandya Siclag, sehe ngajan cuiyujuya me. Sehe cavuya David cojo xuta ladu rě me ngajan Siclag. Pero xi cafehe me ngajan ne, xuta amalecita ne, ha casahmi me si cojo xuta nandya jan. Hane xi casahmi me ganar, quiji cojo me ngu tsě ngu xti tsěhě David. Hacuaha quiji cojo me ngu tsě ngu xti xi tsěhě yějě xuta ladu rě me. Hisca cojo chjuun rě me, cojo quihndi rě me, quijicojo xuta jan. Hacuaha cavaca me ndava David. Hya xi camá ne, cavinenguise rě David Nina, ¿há ndatjin xi cjue tjengui me xuta xi cuacun jan? Hane Nina ne, cachja me xi cuma cjue David. Sehe quijitjengui me xuta jan, hane cavechutaha me. Hya xi camá ne, cavatju vasen xuta jan xi catsiquehen me. Cama cavuya cafaha me yachjin rě me jan cojo quihndi rě me xi quijicojo me jan. Hacuaha camá cafaha nga me

chu rē me cojo sa xcusun rē xuta jan. Hane tsēhē vēhē xi camá cafahtaha me xi tsēhē xuta amalecita jan ne, catsingatju David sacuaaha cjuatjo ngujo chu cojo ngujo sa xcusun xi cafahtaha me jan catsingatju me ndava xuta changa tsēhē ndihya xuta tjē rē Judá ta, me vēhē hacuaaha xuta ladu rē suva me.

Jinguyējē rē xi cuatjin tijima ne, hya xi catsicuya xuta filisteo jan David cojo yējē xuta ladu rē me ne, cavetsihin casahmi xuta filisteo si cojo xuta tjē rē Israel. Hane hiscan xi cajnetaha ne, casahmi xuta filisteo ganar. Hane jemu cjín xuta tjē rē Israel catsiquehen me. Hacuaha quiijtjengui me Saúl hane xi cavechutaha me Saúl ne, catsiquehen me. Hacuaha catsiquehen me jyan cha nixti rē Saúl. Cuatjin camá xi cahme Saúl xi camá castigu rē me tsēhē xi cavetaharcuaain me cjua xi cachja Nina. Hacuaha camá castigu rē me tsēhē xi quiji cavanguise me ngu chjuun surqui xi ma visiajmi cojo hasen rē nima.

**David má me xuta matitjun xi majo  
tsëhë xuta tjë rë Israel**

(2 Samuel 1-6; 8-10; 1 Crónicas 11-16; 18-20; 26:29-27:34)

Hya catsiquehen xuta filisteo Saúl, me xi matitjun rë xuta tjë rë Israel ne, quiji ngu xutaxin nandya Siclag quijitjengui rë David sehe casuacuenda rë David xcusun xi camá. Hane xi camachaya rë David cjua xi cahme Saúl hacuaha cahme Jonatán quihndi rë me ne, jemu choho camaha ni camá rë me. Ngajan xi catsindaja me ngu canción tsëhë me xi chja hacutjin tsinguitsjen me xuta xi cuacun jan. Chja canción jan xi nima Jonatán ne, jemu amigu ndaja rë David camá nima, hane nima Saúl ne, tjutjun camatitjun me tsëhë yëjë xuta nandya Israel. Hya xi camá ne, Nina ne, cachja me cojo David xi cuya cjue nga me nandya tsëhë ciuda Hebrón, ciuda xi tacun xcun nangui xi satë rë xicjin me o sá xuta tjë rë Judá. Ngajan xi David ne, cafe me ngajan, hane xuta nandya jan ne, cavitejnu me aceite rcu David xi casahmi me xuta matitjun tsëhë ngu ndihya xuta tjë rë Judá.



Jinguyējē rē xi tijima vėhė ne, Abner, capitán tsėhė sindadu rė nima Saúl ne, cavetjuhnga me si jan. Hane ngatsė rė xi hvė me xi cahme me xi matitjun rė me, quiji tjengui me ngu cha ndava nima, ngu quihndi rė nima Saúl xi hmi rė cha Is-boset. Sehe cafaha me cha, hane cha vėhė casahmi me cha xuta xi matitjun tsėhė yějė yahnga sa xuta tjė rė Israel. Ngajan cavetsuntaha xuta tjė rė Judá cojo yahnga xuta tjė rė Israel. Ngu nixtin jan ne, me xi má capitán tsėhė sindadu rė David, cojo Abner, me xi má capitán tsėhė sindadu rė Is-boset ne, casahmi me ngu si. Hya xi camá ne, sindadu rė David cacaa rė cha cojo si jan. Sindadu rė David jan ne, quijitjengui sa cha sindadu rė Is-boset jan hisca xi camá jñú. Hane xi cuatjin quijitjengui xicjin cha jan ne, Abner ne, catsiquehen me Asael, me xi hntsė Joab. Si jan xi casahmi David cojo Is-boset jan ne, jemu jyė nixtin quijicani rė. Hane hya ne David ne, cuatjin hitsė sa tivejñahñu cjuahñu xi tjin rė me, hane tijima chuva cjuahñu xi tjin rė Is-boset.

Ngu nixtin hya ne, Is-boset ne, jemu cacjan me cojo Abner.  
Cachjataha me Abner cuitjin:

— ¿Yo xi casua ri cahndë xi canihñi jyë yojo riji xi catsjuñi cojo ngu na xi hacuaha chjuun rë nima nahmi naha? —Cuatjin cachja me.

Hane tsëhë xi jemu camacjan rë Abner xi cuatjin cachja Is-boset ne, cavejñacacun me xi hindë hacuiin má me capitán tsëhë sindadu rë Is-boset ta, David cuisecoo me. Cuatjin camá xi catsingatju me cjuá tsëhë David. Cavinenguise rë me sa xi cuma cjue sahmitangun me cojo rë me. Hane David ne, casua me cjuá xi cjuahatsja me me, peru cjuahatsja me me sá xi hacuaha nduvacojo me na Mical chjuun rë David xi cafaxin nima Saúl. Hacuaha catsingatju David cjuá tsëhë Is-boset xi meje rë me chjuun rë me. Hane Is-boset cojo Abner catsicuya me na chjuun rë David jan. Hya xi camá ne, Abner jan ne, quiji cavisiajmi me cojo David xi meje rë xi cjue tsinguijnehnchan me cjuatacun rë xuta changá rë yahnga xuta tjë rë Israel cojo sa xi sua me ngahñu xuta ladu rë David. Hane David ne, cachuya rë me cjuatacun jan, hane casua me cahndë cafe Abner cojo cjuandaja cjuajeya.

Nixtin hya ne, Joab, capitán tséhë sindadu rë David ne, tisahmi me si cojo ngu nandya xin, hane hviin me mé tijima. Hya xi cama si jan ne, cavuya Joab hane camachaya rë me cjua xi jemu ndaja cavisiajmi David cojo Abner hisca hacuaha casua me cahndë cafe Abner cojo cjuandaja cojo cjuajeya. Ngajan xi jemu camacjan rë Joab ta Abner ne, catsiquehen me Asael, me xi hntsë Joab. Hya xi camá ne, catsingatju me cjua xi cuya Abner, peru tsajin mé cachja me tséhë cojo David. Hane xi cafehe Abner ne, cachja Joab cojo me xi meje cuisiajmihma me cojo rë me. Hane xi camá suva ni Joab cojo Abner ne, sehe catsiquehen me Abner. Cuatjin casahmi Joab ta tséhë xi jiyacacun me hacutjin catsiquehen Abner Asael hntsë me ngajñi rë ngu si xi casahmi me.

Hane hya xi camachaya rë David xi catsiquehen Joab Abner ne, jemu camacjan rë me. Hya xi camá ne, cavitexa me yëjë ni xuta xi cuiyuju me xun rë nima Abner. Hacuaha hisca cojo Joab cachja me cojo rë me xi cuejña me xun rë nima jan. Cuatjin camá xi casacu camajyëcacun yëjë xuta xi hacuiin cojo cjuandaja rë David xi casahmi Joab xcusun jan.

Hane hya xi camachaya rē Is-boset xi cahme Abner ne, jemu catsacjun camahani me camá. Hane jemu chuva nixtin jan ne, jo cha sindadu rē suva me ne, catsiquehen cha me hora xi jiñafē me. Sehe quiji cojo cha rcu me xcun David. Xi má rē cha ne, jercu ndaja cumá rē David xi cahme condra rē me. Peru David ne, ha casua me cjua rē me cojo nima Saúl xi tsiquiin me xicjin me ne, vëhë camá xi cavitexa David sindadu rē me xi cjue tsiquehen cha cha xi catsiquehen rē Is-boset jan.



Hya xi camá ne, xi cavatju cahme Is-boset ne, yëjë xuta tjë rē Israel jan ne, quiji tjengui me David hisca quitaha me ngajan nandya Hebrón. Hya xi camá ne, xuta xi cuacun jan casahmi me xi David ne, camá me ngu xuta xi matitjun tsëhë ngayëjë ni me. Nixtin hya

ne, ha tjin rē yatu nu vasen xi cavitexa David jo ndihya xuta xi tsēhē tjē rē Judá. Hane xi cuitexa me yējē tejo ndihya tjē jan, cantē jyan nu sa cuma.

Hya xi cavetsihin cavitexa David ne, meje rē me xi nandya Jerusalén ne, nandya jan cumá nandya cabicera tjun tsēhē yējē nandya tsēhē nangui Israel. Peru xuta jebuseu ne, siucahndē me ngajan. Vēhē xi titjun meje rē xi tsiquehen me yējē xuta jan. Hane David cojo yējē xuta rē me ne, cavaxētje me yojo rē me hane cafaha me hnchua rē xi texo xi jiyandee rē ndihyavasen rē xuta jan, hane ngajan camá ndava David. Hane xi camá cafahataha me ne, sehe hacuaha casuañihi rē “Ciuda rē David”. Hya xi camá ne, ngajan tahandee rē ndihyavasen jan ne, ngajan cavejña nandya camá jyē. Hacuaha hya xi vatju sa nixtin ne, David jan ne, hitsē sa tivejñahñu cjuatacun rē me tsēhē xi Nina tivisecoo rē me. Hya xi camá xi hisca ngu xuta matitjun tsēhē nandya Tiro ne, catsingatju me ya hacuaha catsingatju me xuta xi sahmixa xi cumandaja ndihyavasen jan sacuaha ngu cjuatjo xi ladu rē me xi sacu rē me cjuandaja rē David. Cuatjin camá xi David ne, cavacun rē me xi Nina ne, cjuaquixi xi tivisecoo rē me. Nixtin xi cavitexa me ngajan nandya Jerusalén jan

ne, cafaha sa David chjuun hacuaha cafaha sa me chjuun xi hacuain chjuun ndaja rē me. Hacuaha jercu cjin sa quihndi casacu rē me cojo yachjin vēhē.

Hane hya xi camachaya rē xuta filisteo xi David má me xuta xi matitjun tsēhē yējē xuta nangui Israel ne, casahmi nga me si jo ndiya cojo xuta xi cuacun jan. Peru catsijo ndiya jan ne, David cojo sindadu rē me ne, cacaa rē me cojo xuta xi cuacun jan ta tsēhē xi Nina ne, hatuxa tivisecoo me xuta nangui rē Israel nixtin hya.

Hya xi camá ne, David ne, cavejñacacun me xi cjuejaha me caxa ximinchacun hiscan cavejña sehe cjuecojo me ngajan Jerusalén ta tsēhē xi xi má rē me ne, hitsē sa ndaja xi ngajan cuijña caxa hindē. Cuatjin camá xi casahmitangun me yējē sindadu rē me sehe quiji me ciuda xi hmi rē Quiriat-jearim, hiscan xi tacun caxa jan. Cafaha me caxa jan cavesun me xcun carreta sehe quijicojo me nandya Jerusalén. Hane ngajñi rē yējē xuta jan ne, taha titē me tisē me cjui me cojo caxa jan. Hya xi camá ne, ndiya cjui chu ndyaja xi javē carreta jan ne, caxtengui rē chu. Hane ngu cha xi tjengui tiña ngaxtun carreta jan ne, xi meje cuindefa carreta ne, catsixinga cha

tsja cha xi cuahangui cha xi suaain cha cahndē xi cuinengui caxa jan. Peru casahmi Nina xi cahme cha hora vĕhĕ ni tsĕhĕ xi casatĕtsja cha caxa jan. Vĕhĕ xi yĕjĕ ni xuta ne, jemu choho camá rĕ me, catsacjun me camá. Hane cahndē xi sahmichihin me cjuatacun rĕ me xi cjueceni me caxa nandya Jerusalén ne, ngu ndihya xi tacun tiñataha jan ne, ngajan ni quijicani me caxa. Hya xi camá ne, Nina ne, casahmi me xi xuta xi ndava hiscan cavejña caxa jan ne, jemu ndaja camaha ni cavatju me camá.

Hya xi cavatju sa nixtin ne, cavuya catsingatahacacun nga David xi cjuecojo me caxa jan ngajan nandya Jerusalén. Hya ne, casahmi me sacuatjin cavitexa Nina xuta tjĕ rĕ Israel xi sahmi me cojo caxa jan ta xuta Levita ne, me xi cuacun vĕhĕ cavesuntyja me caxa ximinchacun jan, hane cuatjin ndaja quiji me cojo caxa jan hisca nandya Jerusalén. Xi cjui me ndiya ne, yĕjĕ sa xuta xi yahnga jan ne, taha cjui me. Hacuaha titĕ me tisĕ me jingunduju ni ndiya jan. Hane xi cafehe me nandya Jerusalén ne, cavejña me caxa jan cahntsua ngu ndihya tsjian xi catsindaja me. Hane sehe catsiquehen me jemu cjín chu xi casua me Nina sacuaaha ngu cjuatjo tjinchihin cojo ngu cjuatjo xi cajinĕtangun me. Ngajan xi David ne, cachja me



xi sinë yějě xuta xi siutaha suihi jan niñu. Hane xi cafě cajiñě me ne, sehe cafe yějě ni me ndava me. Hya xi camá ne, cafehe David ndava me. Hane na Mical chjuun rě me ne, cavetsihin cachjataha na me, tichja na ta, ¿mé má cuatjin catě David? Cuatjin cachja na ta xi má rě na ne, ndajintjin ta tsejen sacuaaha xi ngu xuta tujyě ni, sacuaaha ngu xuta ngarca ni tsejen. Peru cafayangui David ta hacuiin



cuatjin. Mé xi casahmi me ne, casahmi me tsēhē Nina ta catē me tsēhē xi jemu ndama rē me tsēhē yējē ni cjuandaja xi casahmi Nina cojo rē me cojo ngatsē rē yējē cjuandaja xi casahmi Nina cojo yējē xuta tsēhē nangui Israel. Hya xi camá ne, casahmi Nina castigu na Mical ngatsē rē cjuaxta xi tjin rē na ta, casuaain Nina cahndē xi sacu rē na quihndi.

Hya xi cafehe caxa ngajan ne, David ne, cavatēcja me ngujo ngujo xuta levita xi cuiyujutaha me cuidadu rē ndihya tsjian hiscan xi cavejña caxa ximinchacun jan. Ngujo nga me ne, tsijane me tyjo; hane ngujo nga me ne, sē me. Hane ngujo nga me ne, casua xa rē me xi cuiyujutaha me sahmi cuidadu me hiscan tacun tingotjo rē. Peru yahnga nahmi cojo ngujo sa xuta levita ne, cachja David cojo rē me xi cuiyuju ni me ngajan ciuda Gabaón; ta hisca hya xi cavetsihin cavitexa nima Saúl xuta ne, ngajan cavejña yungun tsjian rē Nina xi catsindaja xuta cojo nima Moisés.

Jemu ndaja casahmi David. Jemu cjín si casahmi me hacuaha casahmi me ganar. Hacuaha me vēhē casahmi me ngu gobiernu xi ndaja chichihin sahmi xa, hacuaha casuaain me cahndē xi tujyē

sahmi xuta. Hacuaha catsinguitsjen me cjua xi cavisiajmi me cojo nima Jonatán, amigu rë me. Jercu ndaja cafaacuenda me xuta rë nima tu cun cachja me xi sahmi me. Sehe cavinenguise sa me xuta rë nima Jonatán jan, ¿há tjin sa xuta rë nima xi cjëë sacu rë me? Hya xi camá ne, casacuse sa rë me xi tacun sa ngu cha rengun xi hmi rë Mefi-boset, ngu cha xi hacuaha quihndi rë Jonatán má cha. Ngajan xi David ne, catsingatju me xuta rë me xi quiijaha me cha jan. Hya xi cafehe cha, ndava David cavejña cha vëhë. Sehe catsicuya me cha nangui rë xutachanga rë cha, hane casua me xuta xi casahmixa rë nima Saúl xi sahmixa me cojo nangui rë cha. Cuatjin casahmi David cjuandaja cojo xuta rë nima amigu rë me.



